

王文靖公集卷十



受業 華亭徐賓  
武進王瑋 校訂



序

世祖御製資政要覽後序

臣聞作君作師道必先於立極善政善教義統歸  
乎歸民。惟家國天下羣情之愚智不同。然經傳典章。

百行之貞邪可考。欲援古證今。俾景行而迪吉。必博搜類集。以革薄而從忠。是誠萬世不易之弘圖。而盛治務先之鉅典也。臣伏觀

皇上承精一之心傳。法時敏而遜志。宵衣旰食。勤政所以安民。右史左圖。典學原以敷教。迺於萬幾之暇。鑒觀載籍之文。爰採人倫物理之攸關。以及細行微言之足錄。道可師為率履。事足取為明徵者。輯為一書。名曰資政要覽。臣伏而讀之。仰見

皇上勵精圖治之盛心矣。夫以古為鑑。可知興替。作事謀始。貴辯從違。誠小節而必詳。斯一身可以寡過。果盡人而觀法。則四海可以同風。載誦茲編。無微不至。自朝廷以逮閭巷。所以為行政制事之矩者。往迹備陳。自經史以及諸書。可以為修身立命之模者。洞觀有獲。希賢希聖。道不外乎庸行。尚質尚文。義總期於成化。上行下效。將見邇治而遠安。戶誦家傳。自底政平而刑措。澆漓者可歸於淳樸。顛蒙者可進於文

明。無偏無黨。共睹遵義遵道之休。克剛克柔。事成正  
直。平康之盛。真有裨於治平。而足傳為謨訓者也。臣  
稽於詩曰。訏謨定命。遠猷辰告。書曰。克綏厥猷。惟后  
又曰。凡厥庶民。極之敷言。是訓是行。以近天子之光。  
是皆諄諄。誥誡。而致蕩平順則之效者也。凡在臣民。  
無漫匪彝。無即怙溢。各守爾典。以承天休。斯有合於  
皇上作君。兼於作師。善政資乎善教之  
宸衷爾。

擬平定三逆方畧後序

欽惟我

皇上聖德誕敷。神謨廣運。削平群逆。底定寰區。永底  
民生。長銷金革。鴻猷大烈。振古莫京。臣等至愚極陋。  
詎能仰測高深。頌颺萬一。惟是八年之內。兵間進止。  
悉稟

廟謨。凡水陸攻守之方。竒正疾徐之用。諸將祇遵  
成命。則所向有功。稍一愆稽。輒多債績。應如符契。瞭

若列眉。因茲發縱之神奇。彌見規模之弘遠。臣等職  
司載筆。據事直書。不敢文飾片言。以期存信。而管窺  
所及。竊有可得而揚摧者焉。蓋三逆素蓄狡謀。多行  
不軌。背恩反叛。厥罪惟均。而倡亂煽禍。三桂實為戎  
首。當三桂之初反也。恃其險遠。僭竊一隅。變雖作於  
滇黔。毒未流於他省。

皇上一聞党古里上變。即料三桂老賊多詐。必覘我  
未備。偪我楚南。窺我巴蜀。既

命順承郡王勒爾錦統師南討。又

勅都統巴爾布守常德。朱滿守長沙。提督桑格守沅  
州。以遏其東。軼將軍瓦爾喀。赫業。赴川拒守。以遮其  
北侵。是其為計甚豫。而警備甚嚴密也。設是時守土  
諸臣。一力干掇。保有四封之內。巴爾布等。各率所部。  
電驚颺馳。據洞庭之險。塞清浪之關。瓦爾喀等。乘蜀  
土初擾。防禦未堅。既拔陽平。即鼓僥而進。翦其牙孽。  
修扞封疆。則三桂之兵勢。不能闌出境外。倔強洱海。

之間。有因而踣耳。諸將不亟為之所。頓兵左次。轉饒  
愆期。彼此遂逃。坐乖事會。以致逆賊阻兵蜀道。蠶食  
荆南。浸淫及於江廣之界。而滋蔓難圖。久稽  
天討。幸

皇上灼見軍中情事。累勅王將軍等。厲兵秣馬。迅掃  
狂氛。令貝勒尚善等。列舟艦。肄水軍。占據江湖。斷賊  
餽運。取岳州。收湖南諸郡縣。以搯滇逆之吭。大將軍  
圖海。提督孫思克等。整率師徒。從漢興取四川。以拊

滇逆之背。時尚善圖海孫思克等。猶狃於成見。交章  
入奏。皆言未可進兵。賴

皇上痛斥其非。嚴加督促。毋或逗留。復令將軍莽吉  
圖。以廣西之兵。由南寧入滇。與相犄角。於是貝勒察  
尼等。水陸並進。收復岳州。將軍王進寶。由棧道克劍  
閣。取保寧。提督趙良棟。由畧陽下陽平。定成都。蕩滌  
湖湘。廓清岷益。分鑣競發。進薄滇池。諸道合圍。拔其  
城郭。逆渠殄滅。其黨咸俘斬無遺。而六詔底寧。萬里

無風塵之警矣。是則舉川湖。平雲貴。殲群醜。殪世璠。  
無一不本於。皇猷也。諸臣何力之有焉。耿精忠乘滇中之亂。竊踞  
七閩。侵掠鄰封。肆其兇虐。浙東江右。咸騷然不寧。康  
親王傑淑。奉辭薄伐。總領戎行。仗震疊之  
天威。擊狂駭之逆豎。固宜親提枹鼓。疾走霞關。拉朽  
摧枯。易於反掌。而猥以溫台諸郡。殘寇未平。駐節金  
華。久淹歲月。欲俟盡清。伏莽然後整旅而南。名為持

重之謀。寔亦遷延之役。

皇上長籌遠算。洞矚賊情。於建昌賊退之時。即知精  
忠兵力已殫。人心已潰。必有內變。機在可乘。亟勅王  
等留兵守浙。親赴衢州。進勅亡。何果有大溪灘之捷。  
摧鋒陷壘。逐北追奔。乘勝長驅。勢如破竹。於是巖關  
不守。枕席過師。百城傳檄。而投戈。渠惡望風而納款。  
曾無遺矢折鏃之費。而嶺海之區。仍歸疆索矣。是則  
平福建。降精忠。又無一不本於。

皇猷也。諸臣何力之有焉。尚之信負恩干紀。脅父稱  
兵。與三桂交通。敢為大逆。會閩疆蕩定。我武方揚。  
皇上命將軍喇哈達以兵進潮陽。莽吉圖以兵臨韶  
石。左右夾擊。以蹙廣州之信。勢屈力窮。遂輸伏罪。  
歸正之後。猶怙終好亂。罔有悛心。屢奉  
明綸。趣其親率官兵。赴軍前立效。而之信沮違。  
詔旨。託故不行。矚王師已抵蒼梧。廣州無滿兵彈壓。  
陰勒部伍。復思啟疆。幸

皇上早燭其奸。知狼子野心。終無回革。既因張永祥  
首告。遣侍郎宜昌阿即訊。復因馬承廕叛。命將軍賴  
塔。移師鎮潮。遠以策應柳州。近以控制粵省。迨之信  
反形得實。拘繫武宣。其部下果擐甲執兵。尅期舉事。  
卒賴潮州兵力。先赴粵城。曾不須臾。悉為禽獮。否則  
謀之不早。倉卒變生。五嶺以南。必多騷動。雖天戈所  
耀。旋即芟除。而民之罹其塗毒者。將不可勝言矣。是  
則平廣東。縛之信。亦無一不本於



皇猷也。諸臣何力之有焉。總之

皇上智勇天錫。經畧如神。一切機宜。皆與古兵法相為脗合。滇逆之平也。在乎三路齊入。湖南之兵。正兵也。所謂堂上之陣。正上之旗也。四川廣西之兵。奇兵也。所謂九天之上。九地之下也。閩逆之平也。在乎置浙寇而直搗仙霞。所謂兵尚拙速。不尚巧久也。粵逆之平也。在先以重兵駐潮。所謂以虞待不虞也。此用兵之機要也。若乃先定福建。舉汀潮。以斷廣東之左

臂。而之信勢孤。終不敢鴟張以逞毒。迨之信既執。嶺徼謐如。然後賴塔之軍。由廣西以趨雲南。師行數千里。谿谷林箐之中。而訖無後顧之患。此用兵之先後也。凡此者。皆

聖明指授之成規。非行間諸將所能見及也。至於訓將帥。飭紀律。廣招徠。禁侵暴。褒死事。宥脅從。惠愛蒸黎。拊恤士卒。遣兵則遞相遷代。而行者不勞。籌餉則就近轉輸。而居者不困。

聖謀淵邃。

睿筭精詳。尤非內外諸臣所得而仰為昆贊者也。蓋皇上之洞燭微。萬里畢照。至明也。決機發策。群議莫撓。至斷也。開誠布信。賞罰無私。至公也。鏡往察來。綜畫有素。至豫也。而一本於

聖心之至仁。汲七馬不忍斯民之陷危。而昇以生全。濟之樂利。誠所謂聰明睿知神武而不殺者也。若夫平滇之後。

德音疊布。薦上

徽稱。祇謂

山陵。徧行望秩。告成功而不有。却尊號而勿居。典禮茂隆。功德愈盛。他如召還禁旅。分設鎮防。却勞章泰。賴塔以旌寵其戰功。申諭趙良棟王進寶。以保全其終始。安插投誠將弁。以消隱慝。分別逆屬人口。以免株連。酌戍士之裁留。核將領之臧否。自王貝勒貝子將軍都統副都統以下。皆令功罪相抵。輕重適平。罰

不貸於勲親。賞不遺於疎賤。人心悅服。海寓乂安。七  
德咸昭。五兵不試。巍乎乎。赫乎乎。永清大定之勲。億  
萬年無疆之業也。以其非用兵方畧。故不復編次云。

戊辰會試錄序

恭惟我

皇上統天建極。至聖至神。峻德豐功。超越三五。光天  
之下。無遠弗届。自古未通聲教之地。莫不盡入版圖。  
洽於文治。由京師列省。以迄荒陬。絕徼皆設立學校。  
登進譽髦。念經書為聖賢精蘊。乃興賢育才之本。  
命刊講筵解義。冠以

睿藻天章。頒賜中外。表章宋時理學儒臣。為漢唐莫

及。

親題學達性天之額。以顏其祠。所風厲師儒。嘉惠芹藻之德。意甚厚。又以士子服官。涖政。未知持已處事之方。

御書清慎勤三字。播告中外。訓迪有位。使之奮庸。熙載。有所遵循。以仰贊時雍風動之治。至仁之所涵育。至誠之所孚格。莫不烝烝丕變。歡忻向風。人切帝臣之願。維時康熙二十七年。歲在戊辰。多士景附闕下。

求試於有司者。為數二千四百有奇。

上命臣熙偕。臣乾學。臣其範。臣重。往典厥事。伏念臣

謏劣庸才。濫叨

寵遇。自史官侍從。踐登臺閣。進恭密勿。疊受

聖主異恩。頂踵莫知所報。今復承茲

休命。誠欲得海內賢雋。以佐下風。懼臣微願。但念臣

早廁科名。績學不深。兼通籍四十二年。從事業牘。舊

聞荒廢。惟懼空踈闇劣。不能羅致真才。報稱任使。入

院後。即同諸臣誓戒。矢公矢慎。內外交嚴。地析經分。一堂彙閱。務期屏黜。勅說浮辭。惟理宗先聖行文古雅者。然後詳審再三。慎選登進。乃諸士之文。率皆沐浴光華。太和醇郁。蓋有收之不勝收者。仰見聖明德教。鼓舞神速。為曩古所未有。臣恭遇闢門盛典。得以承乏竣事。竊懷忻幸。既三試三校。遵成例。得士一百五十人。彙書為錄以獻。臣乃拜手稽首。颺言曰。今天下人文化成之盛。一至此哉。爾多士生茲千

古不易邁之

盛時。得事千古不易邁之

聖主。身受千古不易被之教。思惠澤。當其挾策而升。既能篤論質言。以與敷奏之選。今將因言求實。思欲竭節。酌知。將何以焉。宋臣有言。君尊如天。事之當盡誠敬。夫人臣竭忠奉上為誠。恪遵典訓為敬。諸士自為學官弟子。即近光皇極之敷言。以德行道藝。朝夕觀摩。是

皇上與其身心。以聖賢之身心。望其建樹。為聖賢之  
建樹。化育保和。如天溥博。造夫釋褐登朝。則縻以好  
爵。詔以重祿。其所以恤私惠下。委曲成就。又有天施  
所不能及。不能盡者。無非欲其秉志公忠。立身脩潔。  
謹持防檢。出入宣勞。故人臣身受

上恩。思樹駿烈。立顯名。以仰荅高厚之萬一者。舍服  
膺清慎勤之

帝訓。其道無由。夫澹薄自甘。不求浮譽。則真清也。孤

行一意。不結私交。則真慎也。夙夜黽皇。不敢懷安自

便。先私圖而後公事。則真勤也。士幸生逢

堯舜。苟能稟畏

聖言。如上帝之臨汝。霜雪之操。冰淵是懼。而又日邁

月征。孜孜勿怠。俾志神於清明。職修於謹慎。業廣於

勤敏。寧拙戒於初。勿巧持於末。以之守已。雖終食而

不違。以之處事。蓋無往而不效。庶幾哉。誠心實行。以

自效於

朝廷而不負。籲俊之大典矣。設於茲三者。弗克祇遵。或行之不力。不能終始如一。以致曠官貽咎。耻孰甚焉。恭覩我

皇上天光照臨。凡臣下公私真偽之心。辨別不遺毫末。則諸士於茲三者。既厥心。罔既厥心。皆不能逃於聖鑒。戒休董威。功令具在。而諸士策名伊始。如金初範。如玉初琢。咸奉典常為師。以祇承休德。必無有弗若於訓。甘蹈匪彝者。固可無俟臣言。但多士既登籍

奏名。行將為

國家分猷亮采。因竊效古人對揚之義。敬述訓典。懋戒始進。俾相率精白一心。秉道循法。以

聖天子教育之英才。服

聖天子定保之謨訓。脩

聖天子中外之任使。將來勲業彪炳。光照奕禩。謂士之能恪奉

聖謨。立效當官者。惟是科為最。俾臣與有榮焉。則臣

之幸也。多士其懋勉之哉。

戊辰會試金榜殊卷序

國家闢門籲俊。三歲一集鄉國之譽髦於南宮。而大試之蓋天下之文。至此而同司校閱者。欲以一人心目。領辨群作者之思致才情。俾優劣不異。厥惟艱哉。戊辰之春。余奉

命與總憲徐公。司馬成公。副憲鄭公。典校禮闈。竊念文章為經國大業。人才進退所關。余少稟庭訓。於舉業一途。初涉籥籬。未臻堂與。嗣值



景運肇啟。時皆尊尚高華。因日蹙芳藻。以就功名。迨  
脩官吏局。適逢當國者。善於斯藝。對客自高。余知其  
術勝已。歸取前輩鴻篇名選。澄心靜慮。危坐深觀。于  
諸家義蘊所存。裁賞之故。庶幾遇之。始信斯文。古今  
體制雖殊。要歸一致。惟深造自得者。發越光輝。而不  
知其所以然。若有心尚同立異。即反失之。然而中才  
智不能先。喜傍門戶。邇來文體清淳。一切險怪繁縟  
之習。業已芟除。惟是通相祖述。沿習成風。闡中堅秉  
此意。期於力挽浮趨。登諸大雅。然而心目苦短。猶恐  
筭筌之間。悞落英俊。蓋鯁然懷飲冰之懼也。所幸  
同事三君子。皆學窮理窟。識朗秋陽。與分校諸賢。協  
力務求真才。以對揚

休命。惟時徐公。尤以高文典冊。受

聖主深知。向者壬子典試。北闈得人最盛。群情推重。  
獨極賢勞。條約規程。多所裁定。而公樂善為懷。虛衷  
延納。不獨各房人盡所長。與成鄭兩公。交融水乳。即

如駕鉅。無所克堪。亦謬獎以為老馬識塗。採其初議。一時勅說雷同。屏除盡絕。惟入理精純。能標新致者。則急收之。遇有奇文。同心欣賞。不啻獲淵泉之驪珠也。夫制舉之文。先資拜獻。必其立言有真性情。而後發皇為真事業。若尋名理於影響之談。乞膏馥於已陳之句。是猶刻舟求劍。不知其相去遠矣。余輩評薦之次。于此尤為兢兢。榜發後。因盡列諸卷。與天下共觀之。而且為題其端云。

李坦園先生晉太子太師序

今天子紀元康熙之二十一年。

太宗文皇帝實錄告成。

上嘉相國坦翁先生輔弼重臣。卓有勞績。

特命晉階太子太師。兼賜白金文綺良馬。蓋異數也。

於是士大夫舉相慶於朝。鄉人舉相慶於鄉。門生親舊舉相慶於室。以為朝家之盛事。桑梓之欣榮。而宗族交遊之光寵也。余漫閣臣後。為鄉晚進。詎當介一

言為賀。竊聞之。天之純佑國家。必有碩臣良弼。起而翼扶景運。緝締鴻緒。以章明良喜起之盛。至於旂常炳蔚。卓冠當時。而適遇元良懋建。翊贊資賢。則又推九德六行者。進而兼為師傅。如殷之阿衡。周之畢房。皆其人也。若夫史職。雖專在大史。必總裁於相臣。良以本簡冊叙之詳明。而見聖神難名之功烈。使祖宗微妙之德。與兄釐之政。揚觀若在目前。詩書所傳。猗與尚矣。蓋不獨執筆操簡者。必求俊良之選。而受成

其上者。實天下之偉人也。公早年蜚聲藝林。弱冠校書芸閣。壯歲贊理綸扉。秉德一心。多歷年所。皆以宏才重望。結當年

世祖章皇帝異眾之知。及今日

皇上老成之眷。錄成晉秩。由德義之傳。而弘太師之訓。非獨編摩功懋也。蓋坐論之道隆焉。方今海內蕩平。政教翔洽。

皇上仁被普天。知周萬物。纖微皆臻。和光公則忠誠

弼亮。翼。小心。雖於時務規畫。無不洞其機要。人才  
進用。無不當其資品。生民利病。無不切其痼瘼。然温  
恭慎密之德。久而彌篤。政入民敏。曰臣職維艱。嘉謀  
嘉猷。曰我后之德。其密勿獻替。惟欲厝天下於泰山  
之安。在

聖主心鑒其真純。有外廷所不得聞。後進所不能企  
者。至於尊宣和氣。奏績隆平。雖海宇蒼生。被其潤澤。  
大其豐美。亦莫悉其所自來。故公之功業日益恢廣。

勲猷日益炳煥。而持心益謙。守己益和。俊乂已登矣。  
而如未登。未善已盡矣。而如不盡。心淵乎若江海之  
善下。而業則巍然與泰岳爭高。二十餘年之間。未嘗  
終食少移。其治國如治家事。

君如事天之誠。是以

世祖宸衷特注。寵顧最先。

皇上睿眷優隆。倚毗極重者。非公懋德。不能致也。蓋  
公自儲中秘為史官。已綽然負公輔之望。余以鄉里

護才為詞林後進當

世祖時執經勸講。幸追隨後事於帷幄。竊見公盟心登對。儀觀間雅。而辭意慷慨詳切。

上每竦然注聽。及退而共寓殿直。尊其瞻視。則玉質金相。吐其闕議。則珠圓玉潤。遊其泰宇。則霽月光風。所祇教誨者久矣。及今歲將二紀。復蒙

皇上聖恩。又得隨公之後。陪聞國論於黃扉紫闥間。自愧識淺才庸。心之所期。力不能副。每見公處一事。

發一策。於衆見未同。訐謨未定之頃。指歸簡當。群情允愜。滿漢僚友。莫不稱善。不獨余自以為不及。故余

謂今之以師資輔翼承華。雖緣振裘挈領。集史氏之三長。實以作礪作舟。效台衡之咸有也。於以匹休往哲。垂譽無窮。豈不益增盛世之重哉。嘗聞蓬昌運者。其建樹也弘。席世得者。其紹述也遠。憶公奮翼雲達。時當百成。雲雷經綸。君子以之。又公篤生於前明。宰相文敏公家。常平謨烈。相承有素。文敏公時丁晚季。

在位不久。人皆惜其早去。而公遭遇  
聖朝。以耆德元老。常繫四海具瞻之望。屹揚堯舜之  
德。則以後臣為聞知。弼佑文武之基。則以義容邀克  
灼。宜其  
兩朝殊遇。契合顯融。相業麟炳。歷年多而聲施遠。豈  
非上天特生。以翊皇猷。而大家聞者乎。其福祿永綏。  
百世正未有艾也。

梁蕉林先生入閣序

今上紀元康熙之二十七年。綸扉虛席。

皇心思得老成重厚之臣。以襄理治化。光贊太平。於  
時大司馬蒼巖梁公。特被爰立之  
命。銓部即夜宣

旨。公詰旦入朝。卿士百執事。莫不相慶。以為甌卜得  
賢。古今盛事。同鄉後進之在班行者。皆謂公以耆德  
碩望。膺被異數。為桑梓光。在禮當賀。而余以公與先

文貞為同年友。又懿親尊長。蓋父執事公甚久。今幸  
泛閣臣後。雖不文。敢無稱述。以紀其盛耶。竊聞朝廷  
建官。上自鄉大夫。下至官師小吏。靡不視乎其才。惟  
秉鈞之任。不在才而在度。如書所稱一個臣。休有  
容者是也。然天之篤生良弼。將以純佑國家。翼扶昌  
運。其出也。必當隆盛之時。事聖神之主。先使周歷繁  
劇之地。俾閱閱即久。衆望允孚。然後昇以鼎鉉之位。  
蓋亦有其時焉。公自儲中秘為史官。已有公輔之望。

迨後踐登八座。周歷諸鄉。德望日隆。聲實並茂。卓然  
以其身為人倫冠冕者。三十餘年。蓋公道德渙為文  
章。經術妙於經世。數猷典冊之外。凡兵農禮樂。刑名  
錢穀。戶口阨塞。生民利病。人才長短。考經鏡史。無不  
數計燭照。持以應務。如左右逢源。無有不如意者。方  
其官夏卿。領民部也。當海波震蕩之時。值滇逆披猖  
之會。或慮事勢盤錯。畏難棘手。惟公智周而識遠。神  
凝而志定。符行諸將。則洞中機宜。轉餉萬里。則軍興

不乏。用能鯨鯨剪撲。焚燹來歸。厥功茂焉。若夫練習  
朝章。博宗典物。簿書盈案。判決無滯。聚訟盈廷。一言  
五剖。則恢之乎遊之緒餘也。今茲更嘗既久。功業  
顯融。逢

聖天子尊用耆德之時。以黃髮元臣。典機綸閣。舉從  
前之智名勇功。讓而不有。獨以含弘光大。斷之無他  
技之心。進群賢而亮采。沛霖雨以澤天下。猗與休哉。  
信乎兆榮懷之慶。而成調贊之功者。不貴才而貴度。

而大賢遇合。亦自有其時也。是以古之君子。以非進  
之遲速。聽之天。而以不負生平。恪勤官守。視諸已。方  
公執掌部務。或有為公歎淹滯者。公笑曰。予以史官。不  
五年。擢掌邦政。具疏控辭。而蒙

恩不允。今茲有生之年。皆竭力報稱之日也。如子之  
言。豈余所敢知哉。公之寧靜澹泊如此。其特受  
聖主之知。而能任天下之重也。且哉。夫以公有為之  
身。際得為之時。其勲猷彪炳。必有臯夔相伯仲者。區



區功名之士。詎足為我公道哉。

大司農王人岳八十壽序

余兄福山大司農人岳先生。以康熙己巳。由淞閩制府。入筦國計。受任一載。即上疏引年。

天子下詔褒公。慰藉甚至。公感被殊遇。勤於其職。節用惠民。剔除宿弊。閭井康阜。課賦歲登。輿情翕然。稱得人焉。又四年。而公春秋八十。復申前請。

上復降溫旨。慰留。俾往諧所職。縉紳能言之士。相與歌咏頌嘆。謂

聖主何用耆德。恩禮益隆。公以老成在位。單心篤業。不違後讓。皆

朝廷盛事。千古美談。咸思有所撰述。以佐介眉之觴。而余與二三兄弟。被公敦賞有素。又安得默而已也。蓋常思之。古之名世篤生。當敦龐純固之會。居則嘉修孔淑。令德光顯於家。出則翼贊休明。功烈彪炳於國。於時為之昆弟子姪者。樂其庇族元宗。每為祝嘏之辭。以親慕之。如行葦之詩。所云戚戚兄弟。莫遠其

爾。又云酌以大斗。以祈黃耇是已。迨夫升於在位。大業顯融。樂其德澤被人。祝其長生久視。則又有樂只君子。德音是茂。遐不黃耇之頌焉。蓋其人為國交重如此。因以錫大年而膺景福。非偶然也。公自乙未釋褐登朝。選居郎署。已隱然負公輔之望。待後擢持使節。以少叅監治松威。值軍興旁午。督餉于安雅沈黎之間。征調有方。事集而民不擾。是時蜀奉檄開採楠木。川民深入於重崖密箐之中。鳩衆齎糧。行居皆困。

大木猝不能得。公乙丑入覲。極言其狀。天子為之惻然。下詔罷免其役。由是知公才可大用。召入為鴻臚卿。不數月擢御史中丞。巡撫江右。甫蒞事。晉秩少司馬。總督浙閩軍務。旋拜今職。壬申。秦中苦旱阻飢。

上軫念民依。知公雖老。然彊力忠勤可任。

命往賑恤。當炎暑赫曦之時。公疾驅入閩。巡行勞瘁。雖窮鄉下邑。無不徧歷。務以廣

上德意。舒民疾苦。夙夜奉公。不憚勞瘁。雖少年英果。有不逮者。司農總縮會計。其出入盈虛多少之數。極稱繁碎。非心計精密者。不能周知。時當海宇昇平。聖主敷下蠲租之詔。嘉惠元。由直省遍及。周而復始。公官當次對。偕滿漢同列。隨事條奏。歸署覆之。案牘無爽漏者。嚴飭地方有司。無得旁緣中飽。符下。凜凜奉法。其威望孚人如此。遇部事集議。氣平色和。持論婉委。誠至。聞者莫不悅服。或有異同。公坦然處之。

町畦不立也。蓋公才華精敏。而出之小心。雅搯孤鸞。而不存矯激。濟世流慈惠之祥。治身善冲虛之旨。物惠無以滑其和。紛擾不足櫻其慮。所謂上壽之國。而非常教所可限也。夫在昔賢人君子。天既賦以聰明正直之德。而又錫以康彊壽考之身。迨其涉歷世故。更長練習。始畀以高位重任。使之樹勲名。垂竹帛。非此不輕授也。昔宋文潞公。以耆德當朝。有察欽其丰采。即遣使見之。亦驚其年之老。而容之壯。與其才之

精練。以為天下異人。公以年逾謝事之期。屢疏懇求釋位。優詔不許。批答之辭。至以師尚父衛武公為比。恩禮優渥。衆莫敢望。蓋自古黃髮駘背。國家所賴。以詢咨謀德。稽古稽天。內則決大疑。贊大政。而國是有所倚成。外則撫遐方。揚德威。而遠人知所敬畏。所謂巖廊之柱石。而天心純佑之所鐘也。洪惟

聖朝優老之尊賢。駕軼商周。遠非宋比。公宿德重望。

明於當世之務。足與潞伯仲。而遭遇則又過之。宜乎  
鴻績偉伐。銘於鐘鼎。

天寵異數。頻膺屢被。與金石而俱永。流令聞於無窮  
也。即使已在平泉綠野。猶將起而立之。  
朝宁。以為士之矜式。民之依怙。而公受  
聖主特知隆遇。當益殫心竭節。往教用治。豈可復謀  
安求避。而再興懷歸之念耶。余幸附籍宗盟。與公同  
朝共事。衡宇相距。不過數武。得歲陪宗人之後。酌酒

奉觴。以為公壽。有榮施焉。至於朝野欽公之德。羨公  
之年。慕公之遇。競為歌詩。稱述懿美。則又出秉彝攸  
好之同。非一家之言而已也。

張西山八十壽序

往余與公同為諸生。公長於余十有一歲。時以文字相劇切。

世祖章皇帝定鼎之三年。同舉順天鄉試。明年同成進士。公自百里起家。入為儀郎。出視學政。回翔於巴蜀青齊之間。幾三十年。而後致仕歸里。又十五年。為

今

皇上丙子。公春秋八十矣。夫士生同里。開講習同業。

又同奏名釋褐。交遊中。指不多屈。然而升沉聚散。亦  
非一途。公自壯歲通籍。驅馳周道。泛容進退間。已乃  
優游泉石。高年自怡。余得少<sup>長</sup>徵。遂為鴈行。豈非厚幸  
哉。余嘗惟天之於人。其默成而厚期之者。大畧有三。  
聰明特達。彊力多識。是謂得天之才。乘時建功。名位  
通顯。是謂得天之遇。黃髮兒齒。子孫蕃衍。是謂得天  
之報。然或才矣。而未必遇。或遇矣。而未必錫之。以多  
報。一若靳之。一若厚之。何也。蓋劑量盈縮。挹彼注茲。

天固有意於其間。而非人所能為也。公初為仁和令。  
時闔海未靖。兵馬往來。芻蕘輸輓。一切取辦於公。  
殫心經畫。咸若夙具。戴星而出。燭跋而入者六年。而  
以其間。則進邑之父老子弟。教之以型仁。講讓。學文  
修行。閭里之間。蒸<sup>々</sup>向風矣。兩臺材公。以卓異薦。例  
得授御史。會臺員新減額。乃拜儀曹郎。典禮多所釐  
定。未幾。江南學使缺。御試部。即以下。公第一。公首在  
敦實行。正文體。首戊子丑間三。吳士子。習為澆薄。文

章多詭幻。蟲魚草木。幾於不可句讀。公一切蕩滌而  
澄汰之。譚理則以傳註為宗。取裁則以先正為法。士  
始復知有濂洛閩閩之學。而一趨於王唐瞿薛之軌  
範。刊有稽士錄。膾炙人口。所識拔。皆知名當世。臺省  
館閣。肩項相望。江南至今謂公起衰如昌黎。得士如  
廬陵。非虛語也。己晉少奉。分巡川中。土寇却承訓。就  
撫復叛。公下車甫二日。提師入雅州擒之。歸男婦以  
千計。三省會勅李永亨。公當調兵食。餽餉相繼。幕府

論功居最。蓋公自少時。於韜鈴家言。靡不精究。臨事  
勇決。多此類也。自蜀歸里。課子杜門。尋起補青齊。青  
固瀕海。以奠鹽為業。時海禁方峻。片板不得入海。民  
無所謀利。公至。稍弛之。民乃謹然。謂公實生我。政  
事之暇。益覃心經籍。著書五說。數十餘萬言。以博學  
宏詞待詔。

闕下。會山左大祲。公怒然曰。吾何忍以一清華。膜視  
數百萬生命。乃自請往賑。所至為席屋以居。流移者



為糜以食餓者。發粟以賑老弱者。全活不可勝數。著有賑荒考。山左至今尸祝焉。蓋公學問俱有根柢。設施措置。悉本於經術。而膽力智計。足以副之。坐而言。起而行。皆得窾要。中朝悉重公。謂當膺節鉞重寄。如藩臬。直俯首拾之耳。而大吏素有所不快於公。伺公却。無所得。於公政守。皆註優考。獨以老中公。蓋公通籍久。又素抗直彊項。不屑隱年。遂致政歸。而公自此亦絕意仕進矣。夫以公之才。若彼。所遇僅若此。造物

者。疑有所靳於公。顧泰然。適然。無幾微愠沮之色。有子五人。孫十餘人。皆彬彬。孝謹。勤於家業。公神愈。玉貌益腴。步履飲啖如壯夫。造物於公。又若有獨厚者。蓋靳之以祿秩。而厚之以眉壽。靳之以身外之浮榮。而厚之以人世不易幾之福。此余所謂挹彼注茲。天固有竟於其間。而非人所能為也。七月既望。為公懸弧之辰。鄉之士大夫。與海內之從公游者。咸思所以觴公。而徵言於余。余不敢以諛詞進。乃述公之出處。

與其宦績之最著者。以為公壽。而因卜造物之於公。將單厚而多益。固未可量也。公所繪自勉圖。叙其生平甚悉。余竟歲時伏臘。朋好過從。必又有繪圖娛公。以繼香山洛社之後者。時一展玩。公庶幾听然而笑已。

王文靖公集卷十一

受業

固始閣錫爵

仁和翁高年

校訂

序

通鑑本末紀要序

泛來史筆不同。求其理明事核。則惟脩道之君子。德有其言者。乃能為之。是故不讀左國。不知春秋之謹嚴。不觀十七史。不知通鑑之為資治也。通鑑一書。包括古今。舉撮機要。務取闕國家興衰。生民休戚。可脩

法戒者。著之於篇。筆削舊文。咸有深意。法洵善矣。然  
編年紀事之體。雖至此大備。而欲求一事。務為精  
熟之法。則又在袁氏紀事本末一編。欲垂世立教。誅  
亂討賊。則不可無朱子綱目。以繼麟經遺旨。二書皆  
後通鑑而作。可稱善述。第本末變其體。而概沿其文。  
綱目詳其大。而或略其細。世未有能兼收二書之長  
而裁節之。以成一家者。嘗惜之。今雲貴總制綏遠將  
軍仁庵蔡公。不遠數千里馳書。以所纂通鑑本末紀

要委序。余初讀篇首襄敏公題詞。則知其稟承庭訓。  
仰師古人。蚤有是撰。以承先志。見家學之懋焉。載讀  
公自序。則知其斟酌二書。補救四闕。其事與文。雖取  
諸君實機仲。其義則折衷考亭。見史學之精焉。至於  
考證校閱。援據精詳。博綜舊聞。旁諮時彥。方諸道原  
外紀。既無其荒唐。揆於廬陵書法。復進於多識。見集  
思廣益之誠焉。蓋屬草木天。常攜行篋。中間掃蕩克  
渠。決機行陳。倥偬戎務。猶不輟丹鉛。迄於功成移鎮。

遂三易稿。以命梓人也。積十有九年。始有此書。不亦  
勤與。方今海寓安和。文明蔚起。公以方召之壯猷。建  
綏殿之偉績。其功固足以銘諸禹鐘。播於雅頌。而又  
以其暇。蒐緝典文。發皇大業。以為黻黼太平之助。所  
謂長才大度。無所不淹者。非耶。吾觀公材德並茂。經  
緯咸宜。恭遇

聖天子。文思欽明。同符堯舜。所倚毗以效翼為。襄治  
理。比於禹臯。益稷之謀猷。余所服膺。又不獨茲編之

美善已也。

王迂叟奉祀鄉賢錄序

康熙三十年某月日。文安迂叟王公。以鄉賢奉祀於  
學宮。其子戶部中<sup>即</sup>。輯其邑士民所舉公之行實。及  
諸有司之詳文。學使中丞之批答。刻成一編。名曰奉  
祀鄉賢錄。求余叙之。余觀公之所以得祀者。六行著  
於鄉邦。蓋有合於古先生沒而配於社之義。其詳已  
載錄中矣。顧余於鄉賢一祀。竊不能<sup>無</sup>所感也。今夫士  
君子自命。寧不當尚友古人。為天下善士區。尸祝

一鄉云爾哉。然而古之王者之取士。必於其鄉者。何也。良以天下大矣。士生其中。名浮於行者多有。人或不及察。唯一鄉。則朝夕相依。聞見甚切。苟於一言一動。一取一予。纖悉不當於理。未有肯心悅誠服。而不私議者。况肯明揚而清舉之乎。所以論人品者。必以得之鄉曲者為最真也。前明學宮之制。特設鄉賢祠。祀其鄉之賢者。其鼓勵鄉人。俾敦實行之意。至深且遠。河南劉文靖公嘗謂邑有二程夫子。至不敢奉其

親之主於祠。則其重可知矣。沿及末流。弊徒文具。乃有事功氣節。傳播寰宇。而孝謹衰於門內。武斷行於里中者。立名非真。寧堪師表。然且居然俎豆前賢之列。遂使有識者以為耻。此世道人心之所以日微也。使皆如公之禮祀報稱。德符其名。允合祭義。豈不足風起奕禩。而為黌序之光乎。吾聞公先<sub>之</sub>。有孝子名某者。幼不識父長。徧求之。卒賴神助。得奉以歸。三季之傳。至今不朽。蓋文安王氏。一門德行。世為鄉望如此。

余文視本寧宏甫蕉巖三君子。豈能為後。然秉彝之  
好實同。能於公之肇祀。不喜而一言乎。公諱景祚。順  
治丙戌進士。官終鴻臚寺卿。敷歷中外。俱有殊績。非  
可以一鄉之善士限之者。埏也勉之。孝子之後有公。  
公之後。是在埏已。

翁鐵庵家譜序

琴川翁奉常涵虛先生。與先大父方伯公。同登萬曆  
壬辰進士。先生之孫鐵庵。康熙丙辰。以

廷對第三人。讀中秘書。寓居京師。與余修世講之誼。  
不二十年。鐵庵拜官工部尚書。謁告歸。召入為大司  
寇。累贈其父祖曾祖。皆如今官。丙子夏。以族譜徵序  
於余。余受而讀之。既卒業。喟然嘆曰。是仁人君子之  
用心。而孝子慈孫所當篤念而不忘者也。余惟尊祖

故敬宗。敬宗故收族。收族之道莫大於譜牒。俾昭穆以序。親疎有辨。得以因其等級而行其保恤。然後仁義昭而禮讓立。乃鐵庵之意。則非直此而已。蓋將訓其子孫也。若曰。使吾子若孫讀之。而藹然思孝焉。油然而敬焉。愾乎其有所慕。懼乎其有所警焉。是鐵庵作譜之意也。按翁氏受姓始於成周。至漢而顯。歷晉唐宋元明。源遠而流益分。若閩。若越。若吳楚。若淞之東西。皆有世系可據。其在常熟者曰景陽公。則鐵庵

之所自出也。景陽公至公。總九世耳。譜斷自此始。為前乎此者。無可徵也。無可徵。則闕之。闕之者。慎之也。宋狄武襄既貴。有以梁公告身獻者。謝而不受。君子題之。而世顧有泛托遠引。以侈其門閥之盛。遂、華、胄。識者為之齒冷。鐵庵於此。蓋兢兢焉。於其本支。則謹書。各為小傳。以係於後。而散見於各省者。則另為廣族譜一卷。以備參攷。嚴而核。寬而不濫。蓋即家乘之中。寓良史之法。用意固精且密矣。雖然。鐵庵之意。



又匪直此而已。其家傳自景陽公以下。必備著其五  
身行己之大節。原本忠厚。服勤力學。以明先世之所  
以保世而滋大者。必有其自。而於伯叔兄弟并沉消  
長之故。亦詳載之。錄其所長。而亦不遺其所短。余故  
曰。鐵庵之為是譜也。所以訓其子孫也。余茲重有慨  
已。涵虛先生。兄弟五人。兩登甲榜。歷銓諫。赫々有聲。  
兩以乙科至州牧。當是時。隸川翁氏籍。里閭乃未  
幾而中落。鐵庵序其太夫人荼苦之狀。二三兄弟流

離窮餓。不可卒讀。而鐵庵復以踐更株累。歷人生未  
有之顛躓。困極而亨。否極而泰。非偶然也。善乎鐵庵  
之言曰。由前觀之。當思其所以盛。由後觀之。當思其  
所以衰。盛而復衰。衰而復盛。回環倚伏。為子若孫者。  
可以知其所守矣。此則鐵庵作譜之意也。余深怪士  
大夫身籍通顯。往々諱其先世之樸陋。及微時之困  
阨。而先達之後。子孫流落。至不能自存。猶謂々然矜  
於其鄉曰。吾祖吾父。曾為某官。此適足以增其先人

之辱而已。觀鐵庵是編。有不汗浹者乎。寒家受姓自  
太原。始祖任丘公來京師。至於余。甫五世。先文貞公  
為家乘。斷自任丘公。猶琴川之始於景陽公也。於先  
傳。必謹書其生平之實行。而不敢有溢辭焉。亦猶鐵  
庵之欲傳信於後人也。余少而失學。老復善忘。方規  
不能有所著述。以附於作者之後。而於鐵庵之族譜。  
則三復而不忍釋手。又不辭其弁陋而序之。亦以冀  
當世之為子若孫者。各思其先世之澤。善為績承。勿

為廢墜。則鐵庵先生是譜。所繫於人心世道者。豈淺  
鮮也夫。

劉懋恒十四世宗支圖序

萬物本乎天。人本乎祖。故聖人敦倫睦族。使天下皆知本之所自出。則疏者可親。遠者可近。舉芸生之衆。合為一體。雖千支萬派。必世百年。而仁人孝子之心。洋溢充周。一切猜嫌凌競之端。無自而起。乃天性日漓。世風不古。遂有擾鋤德色。同氣鬩牆。即父子兄弟如秦越然。矧欲推其恩於伯叔昆季。以及再從三從。更欲廣其敬於高曾始祖。以及祧主毀主。其可得耶。間

有一二務本之士。亦思敦崇古道。力挽頽靡。而族類難齊。盛衰頓異。每見高門閹閹。焜耀當時。不教傳而子孫陵替。轉徙四方。譜系宗支。莫可究考。又比之然也。然則十四世以內。如生一時。如同一室。扶然以叙。油然以和。豈易覲哉。予友銀臺虞山虞君之故交劉君懋恒。可謂知本者矣。自乃祖某公。卜築於西山靈水間。去京師數十里。其琬壇扶輿。磅礴而鬱積。遂有魁竒忠信才德之人。代生其間。而朝廟宮闕之壯麗。

聲名文物之漸摩。又有以廣其耳目。見聞。而不與僻居山野者等。擇地而踰。聚族而處。非孝弟之行不為。非詩書之義不講。父誠其子。兄勉其弟。寧實無華。寧止不殆。而囂塵城市。形勢奔走。概不足炫亂其心思。故撲茂純固之氣。根深膏渥。而涵濡蘊蓄之。以厚積光流。延及劉君。且十四世矣。一旦珥筆趨墀。桂蘭起草。乃猶兢兢。不忘所自。取十四世之宗支詳系之。既備之家乘。復圖之卷中。俾宗以統支。小不間大支。以

屬宗。卑不踰尊。十四世以上。荒畧者。不敢自誣。十四世以下。將來者。可以例載。本天本祖之理。開卷了然。為政始於教家。作忠先當盡孝。不謂之知本得乎。其家聲之遠大。世教之靈長。裕後光前。又豈特十四世而已耶。昔張公藝九世同居。楊道以宗支圖垂範。皆傳之史冊。侈為美談。予雖未獲親至劉君之家。得與其父兄子弟遊。而余友虞君稱道不置。因得披其圖。喜劉君之知所本。而不與俗同也。聊誌卷端。且使世

之人有所勸焉。

閻梅公家譜序

登喬嶽之巔。百步一盤。則知衆山之勢小矣。溯黃河之流。千里一曲。則知衆水之源近矣。入金張王謝之家。瓜綿叔衍。世德相承。則知其積之厚矣。夫氏族之重。始於晉。盛於唐。斯時也。指崔盧為禁變。目蕭裴為世冑。然而家法稱柳。整肅貴顏。無他。登其堂無驕子。視其後多象賢。故能受厚寵而不驚。處顯榮而不溢。以其所培植者久而發祥者大也。今吾讀閻氏譜而

重有感焉。閻之受姓。始於周。仕於晉。封侯命相於漢。唐。其紀載在史冊。繩之。不絕。以其邈不可考也。闕而不書。而獨推本於指揮公。曰。此吾宣鎮閻氏之始祖也。生於斯。長於斯。聚族於斯。合而為兆域於斯者。三百餘年。可不謂久乎。有蔭。有爵。有封。有贈。有功。勳。薦叙。文德武功。箕裘奕葉。可不謂賢乎。十世以上。佩印腰金。閻里稱羨。至中丞公。以文章取科第。開府於豫。贈祖父如其官。始易文階。其功名可不謂盛乎。惟其

久也。積厚流光。歷教百年而益大。惟其賢也。續前裕後。各能克振其家聲。惟其盛也。庸功之奏。著於旂常。保釐之績。聞於四遠。語曰。培塿之下。無松柏。而山澤之秀。有丹砂。觀於茲譜而益信矣。今世之謂譜者。不然。其所謂久。必托黃炎之子孫焉。其所謂賢。必附於汾陽之後裔焉。其所謂盛。必加溫廷筠之諷。今旅者焉。而中丞公曰。是誣吾宗也。是輕吾祖也。是親人之親。而忘吾親也。余則何敢。故一以指揮公為主。其非

宣鎮者不與。謹而嚴。約而不雜。條分而理析。記曰人  
道親也。親也。故尊祖。尊祖故敬宗。敬宗故收族。收  
族故宗廟嚴。吾於斯譜而知人治之大矣。以媿美於  
金張王謝。其軼而上之乎。不辭而弁諸首。以告世之  
為譜者。

重刻安雅堂集序

萊陽宋先生。文章妙天下。天下能文之士。無不知先  
生者。今年春。先生子某。重刻安雅堂詩文集。各若干  
卷。以熙常受業於先生。而屬熙序之。嗚呼。先生之詩  
文。天下皆知之。亦皆能言之。熙何能贊一辭。惟是生  
平患難周旋。離合聚散之迹。則有可述者。謹拜手稽  
首而為之序。蓋甫執管而淚泫下也。憶自前明乙亥  
先生舉茂才異等。來京師。與先君文貞公。申僑胙之



好。家有小樓。顏曰勝引。先生至。輒坐其上。相與揚榷。今古。軒眉抵掌。流連竟日。熙時七歲。侍坐於側。聽之。媿。忘倦。自乙亥距今六十二年矣。甲申都城破。先君挈熙南下。與先生遇於武林。訂為北歸之計。兩家孥。各僦舟而居。檣帆連絡。相依為命。時干戈滿地。風鶴皆驚。履危蹈險。其得免者幸耳。既達萊陽。先生讓宅以居。暇輒課熙為文。講論尚書大指。不以流離故輟業。乙酉冬。先君還京師。丙戌。

詔再舉鄉試。熙與先生讀書報國寺。維摩方丈。一燈熒。呼唔之聲。與晨鐘暮鼓相間續。先君俸入不足供家人饘粥。熙裹襦被泛先生。藿鹽或不能繼。猶時時仰給於先生。任真推分。藹如也。其年秋。與先生同舉鄉試。明年同成進士。熙叨預館選。而先生以二甲視部事。即舍相望。每熙自館歸。先生泛署中出。質疑問難。無異蕭寺時。未幾。先生脩兵秦州。晉而浙。憲長族不送子。與先生夙憾。飛書上變。逮先生入對簿。一門

成就繫

詔旨嚴切。中外莫敢窺其門。照時橐饋往視。持先生而泣。先生笑曰。死生命也。雖囹圄中未嘗釋卷。頃繫二年。事始白。久之。補原官。為四川按察使。會入覲。留京師。吳逆告變。妻子在蜀。先生志不自得。竟悒以死。嗟乎。先生早負盛名。不得排金門。上玉堂。而浮沉郎署間。俯仰眉睫。可謂詘矣。及總憲外臺。方可少自發擡。而為僉士所構陷。幾不自保。又何窮哉。既賜環

柄用矣。烽烟間隔。室家離阻。卒坎壈以沒。豈真所謂文人少達。而多窮耶。抑古來賢人傑士。自有其可傳者。而不在功名之通塞耶。先生沒之四年。滇黔巴蜀。相繼底定。

天子徵用文學之士。使先生而在。石渠天祿之間。自當首讓一席。出其經濟學問。以為我國家之光。而惜乎先生之墓草已宿矣。雖然。先生詩文具在。光芒萬丈。不可遏抑。豈惟當世能文之士。相

相與誦揚。恐後千百世而下。猶將謳吟讚歎。讀其詩文。想見其為人。則信乎先生之可傳者自有在。而不  
在遇合之通塞也。公子其盛年工為文。能守先生之  
學。比自萊陽來。握手道故。見余髮種種。相顧歎惜。熙  
因為備述先生相遇之始終。與夫生平維合聚散之  
迹。繫於先生之集而歸之。見熙於先生。不獨文章道  
義漸摩之。久而死生患難之際。周旋最真。俾兩家子  
弟識之。世世無相忘也。

江采伯奏疏序

楚中采伯江君。世以經術文章。為漢江士大夫之冠  
冕。蓋有德有言之君子也。一日手出一編示余曰。此  
昔年承乏西臺章疏也。能惠一言以增重乎。余受而  
讀之。見其閱議石畫。足以古之為諫臣者並。而又美  
君入臺未久。即以能效忠言。受如  
堯舜之主。謨明弼諧。擢用不次。其遭遇之盛如此也。  
方其由循吏而擢司臺察也。其於國計民生。是非利

病。即事深言。智如觀火。披其文。則藻質俱存。玩其辭。則婉直兼備。其忠厚足以培國家之元氣。其正大足以平人我之物情。用是數年以來。凡有論建。率多報可。或立見施行。遂蒙聖主特達之知。由臺班峻陟卿寺。蓋盛世登進。謇諤之臣。與容納直言之美。足以詔來禩而風四海。誠非漢唐之後所可及者。而君遭逢昌言不諱之朝。遂得慷慨發舒。以言論風采。馴致通顯。亦

非賈陸諸臣之所敢望也。夫自古聖王。莫不樂以韜鐸求言。在昔賢臣。莫不願以忠謀悟主。然而明良間世。世一遇。其故何哉。人臣進言之要。莫先於立誠。尤莫難於識體。非殫心篤業。即其言剴切可誦。或矯激而近名。非洞晰要機。則於事本實既乖。迂疎而寡效。求其能察治忽之原。妙開成之會。抑誠難矣。江君心既真純。才尤通敏。用能上當天心。下協輿望。誠有非偶然者。然古之良臣。寅恭夙

夜知無不為司言責者。樂效忠。蓋蓋其一端而已。今  
江君既受殊恩。踐登華要。則願勿以前事自足。當益  
思殫心。猷為以對揚休命。余與君比肩事主。竊效朋  
友責善之義。願君於此加勉。故不辭而為之序云。

李書雲奏疏序

皇上御極三十有八年。己卯春。視河南巡

駕次揚州。給諫李公書雲。迎謁道左。時公家居二十  
年。春秋八十矣。

上召見行殿。慰藉久之。詢問備至。賜御書詩綾一。扁  
額一。命奏對有未盡者。親寫以進。公退。繕奏以俟。

駕自江南回。公再進謁。

上命閣臣宣諭。李某何為言官。本章多好。今年逾八

十精神甚健。居鄉謹慎。著始科。臣內陞例。優加一等。進公大理寺少卿。仍念公年高。不任事。又御書香山洛社四字。以賜。一時臣民無不額手驚歎。謂公為言官于二十年之前。而皇上眷公于二十年之後。仰見聖明留意人材。雖歲月以遠。而其人之品行學問。未嘗不流連于心。又以見公之忠讜有素。積誠所感。至是而始發摠也。公既頓首謝歸。而輯其奏疏之存者。

得四十一篇。付之剞劂。郵書於余。曰。子其為我序之。蓋公與余同成進士。意氣雅相得。始余在史館。公為部郎。暨公居臺垣。余在會議班列。無日不以忠義相切劘。至於退食之暇。泛容文酒。握手言笑。亦復與公為多。契濶以來。時形寤寐。今得是編。讀之。覺精神半采奕。於楮墨間。猶是同朝晤對時也。然余讀公之自序。亦足悲矣。謂屏棄以後。見者以為不祥。伺之奏疏。欲得一人序之。而慮彼難於措詞。蓋公之憂讒畏

譏。小心慎密如此。而余知公之自信。則固有在矣。居  
言路十七年。不立異以沽名。不植黨以自固。為國計  
則務持大體。而不事補苴。為民生則急救阡危。而力  
圖實濟。今其言具存。非余阿其所好也。嗟乎。趨舍殊  
途。升沉異轍。公於此中。不無感慨。由今視之。則譬如  
朝槿之暮落。蜉蝣之夕逝。而公方以昔年碩德。相羊  
於平山蜀岡之間。子孫滿前。曾元環侍。濯清水而追涼  
風。坐南榮而曝朝旭。公斷不以此而易彼矣。况我

皇上方篤念舊臣。恩禮兼至。既尊顯公以風示天下。  
自此日有告。月有存。欲有問焉。則就於其家。當有如  
古禮所行者。而文孫庶常君。方以經術自任。工於文。  
勤於學。繩祖武而光大之。則公愈可以自慰已。洪範  
曰。身其康疆。子孫其逢吉。余於公益信云。

王在茲承恩圖畧序

承恩圖畧一卷。吾宗在茲先生。歷叙受

國厚恩。中外歌歷之圖也。先生年甫十七。即以成均  
高第。推擇入翰林。掌司翻譯經史。是為順治辛卯。距  
今康熙甲戌。業已四十四年。為公覽揆周甲之辰。蓋  
自受

命。再撫滇省。改燧者六。惠化大行。因舉平生服官迹  
效。繪為是圖。條分纂列。十有六幘。所以感榮遇。志不



忘也。余聞古之卿士大夫。其才德光煇。為時所賴者。則天子錫之爵位。以尊顯之。迨踐履中外。有大勳勞。則又紀之太常。書功盟府。其恩澤至渥也。當此之時。其臣既受主知。思所以竭節效忠。對揚休命者。亦無不極其至焉。迨大功既立。然後銘之鐘鼎。以昭示子孫。蓋明良際遇之盛如此。公自讀書中秘。已有祥麟威鳳之望。既而佐理樞部。荒閱逃亡。明恕兼行。吏民畏慕。迨<sup>後</sup>晉司六察。按行秦隴。凜、乎理輪攬轡之風。

為。歸而移館度支。心計<sup>周</sup>密。號稱望郎。皆奉天語褒嘉。有治行尤異之目。蓋公之展采於內者如此。及其畫輪黃蓋。分憲溢城。玉節金符。監守吳越。則又以清修惠化為先。所在稱治。其宣力於外者又如此。是以望實日隆。咸謂宜膺隆寄。嗣值滇池震驚。王師討逆。適公需次吏部。遂晉秩方伯。從軍而南。所在替理招撫機宜。區畫軍興利便。俾無失之。經營况瘁者數年。夫滇古梁州外境也。高固職凜。激澗滌紆。因

則郡縣屯衛。蠻獠雜居。外則鳥言卉服。實琛獻見之  
國。星拱錯繡。為西南一大都會。號不易治。然公自擢  
本省左使。望雲霓。俟來蘇之衆。業已服其威信。暨舊  
疆克復。賊猶假息危城中。而公中丞誥下。遠近歡呼。  
公憑圍鞠旅。則志珍鯨鯢。衅甲橐弓。則惠來鴻鴈。沂  
戩。罇泣止之初。迄竹馬再迎之後。盤錯裕如。不虞跋  
蹙。所以造士安氓。寧其斡正。俾風俗之美。殆與雄藩  
無區相等埒。今試按圖。參考。則公經世之宏才。與庇

民之大德。莫不彪炳卷軸。而

聖主任賢之專。盛世報功之厚。所以超絕千古。激勸  
將來者。亦皆具列是圖。使後之觀者。聞風興起。勉勤  
職思。期以祇承恩遇。於人臣大有賴焉。余與公。系同  
出太原。共事

兩朝。比肩交戟。見公功業之隆。固已與年俱進。而公  
自弱冠升朝。暨今服官者。又圖中所繪狀貌。少壯亦  
各微有不同。則公之殫其猷為。經四十餘年之久。始

能大有建树。良不為易。而以一身疊受  
聖恩。其思圖報稱。塞者必且夙夜孜孜。期至毫釐。如  
一日焉。此固公之素志。而人臣之盛節也。是為序。

楊元凱平閩紀事序

康熙戊午之夏。海島餘孽。盜弄兵於漳泉之間。  
天威赫然震怒。爰

命江南提督楊公。以少保兼太子太保左都督。充福  
建全省水陸提督總兵官。往彰天討。尋又允公所請。  
令專統步騎諸將。進號為昭武將軍。蓋兩蒙  
特恩異數云。余時方承乏本兵。每觀公奏報章疏。及  
規為措置之方。罔不精確明審。洞中窺要。私謂賊不

足平也。及公功成。旋師雲間。於菟閱之暇。編輯當日  
入告嘉猷。及軍中往來咨啟牌示。共成十三卷。名曰  
平園紀事。千里見遺。屬余并一言於篇首。夫用兵之  
機變。至難言矣。當其運籌決勝。出幽入明。動於九天  
之上。而發於九地之下。使熊羆糾桓之士。奔走於指  
縱所及。罔敢自愛其力。猶凜凜有弗勗之畏。迨謀成  
事就。終莫測其神智所自來。此名世英傑。知微知彰  
者所能。而非拳勇小技。龜勉跳盪者之所能與也。方

公至軍中。正值炎微不戒之後。賊踪窺伺。海墘草竊。  
充斥山藪。風雨亦漂搖矣。而公應之裕如。臨事雖呼  
吸萬變。而神閒氣定。如平時。據所蘊蓄。使諸將拱受  
約束。若兩駘在靳。五金受范。罔不環至五效。又能席  
屢勝之威。開布大信。以弘招納。不獨脅從罔治。雖因  
敗來降者。亦推誠撫恤焉。今試取其成書。披尋流覽。  
其中戰守之關鍵。賞罰之先後。軍實戍卒。山川要害  
之經理。纔然如長江東注。挹取不竭。若挽大屈之

弓以穿札。無不應弦洞徹。斷之以老謀。成之為壯事。汎掃揚馨之鯨鯢。築為京觀。馴致頑梗歸化。曷興風清國家聲名文教。周洽於天地之所盡持。即虞帝光天之下。至於海隅蒼生。周王方行天下。至於海表。罔有不服。何以加焉。夫古之名將。廓清寇賊者有矣。苟得甲士之歡心。戰無留俾。則耕田鑿井之氓。未必室家安堵。苟持重內固根本。則執訊獲醜之告。不能不少引時日。蓋兩者若是之難全也。昔者祭成侯。制御士心。不越法度。所在民吏。不知有軍。賈君又壯勇剛毅。敢於深入。數與諸將。漬圍解急。而未嘗挫折。史冊並書。以為美談。若公不啻兼二子之勞烈。風徽何其遠乎。夫闔海故百身地也。當漢元封之世。橫海接船之功偉矣。然當時方略文告。簡冊寥寥。雖辭事詳約。古今良有不同。而後人遂不得盡見其攻守攘拓之形勢。覽者不能無歎心焉。今公修文事於武備之餘。而又幸際盛世。白雉來庭之鴻運。海波不揚。遠人來格。

此書遂依附克日未光。益致融顯。故余樂為言之。不獨見  
聖主知人善任。致薄海臣服無外如此。且欲述公之  
美。必勉夫後之為將者也。

式古堂文集序

自昔名臣勲業顯著者。必有文采可觀。蓋忠君報國  
之誠根於中。則措諸事而事辦。發於詞而詞達。所固  
然也。元侯又南張公。為襄壯公長嗣。

天子以襄壯公扞衛西隅。厥功維懋。筮仕即除京卿。  
昭異數也。未幾進大廷尉。又未幾海氛掃蕩。幅幘加  
關。思得重臣以彈壓之。乃授節鉞。改元戎。襲封為侯。  
往鎮全閩。

陸辭之曰。錫賚有加。且請三年一入朝。  
上許可。公感激。

聖恩。恪思前列。戢部伍。恤閭閻。謹斥堠。詰奸宄。軍民  
晏如。崔苻屏息。復與采風使者。守土諸司。尺牘往還。  
並諄。於士習民風之本。由是遐陬僻澁。宛若春臺。  
辛未。再入覲。出式古堂一編示余。屬為之序。大約在  
朝之作居一。出鎮之作居九。其氣醇。其辭贍。其論古  
有識。其紀事有本。章奏則詳明。簡札則暢達。吟誦則

瀏亮。文章之能事備焉。至其念不忘

君。即登山臨水之間。築掾栽卉之細。必歸本於

國恩。主眷。斯所謂措諸事而事辦。發於詞而達者歟。

余忝兩世知交。固樂觀其著述之富。惟是年當頽邁。  
筆墨以燕。何能以言重公。會抱疴暫假。取是編而展  
誦之。深歎公忠貞世篤。為盛代名臣。洵足光史冊而  
度越前古。且以見昇平之樂。河清海晏。折衝樽俎。皆  
有事於風流儒雅。非偶然也。爰述數語而歸之。

王文靖公集卷十二

受業

順天郝士鈞

嘉善丁棠發

校訂

序

胡宛委息游堂詩集序

太子少保吏部侍郎兼翰林院侍讀學士胡公予系  
之詩凡十卷。西泠處士陳祚明既編次而論定之矣。  
其子介祉予壻也。復請予為之序。蓋公自順治丙戌



登第。即入翰林。癸巳之春。以御試超兩階。進侍講。是為世祖章皇帝御極之十年。由是踐登禁近。為論思密勿之臣。辛丑。佐掌邦治。壬寅。因疾請告。癸卯。遂卒於家。今上嗣登大寶之康熙二年也。公以弘才碩德。受知兩朝。遭遇可謂盛矣。故集中諸詩。應詔者一。扈蹕恭紀者。二十有二。而寓直即事之咏。不與焉。皆洋々雅頌之音。可以薦之郊廟。奏之朝廷者。蓋當是時。

世祖以聰明齊聖之資。典光明緝熙之學。敬天尊祖。則郊祀躬親。親政憂民。則批荅詳允。即至狩苗冬夏。教閱車徒。補助春秋。登臨山水。珥筆代言之士。未嘗暫離於側。詢謀周咨。無不極其誠款。公生逢盛世。忠貞之志。既足以交孚聖心。典贍之才。又足以發揚聖德。故有舉必書。辭醇意摯。比諸明良。颺拜之歌。無多讓焉。其餘或山川行邁之作。友朋贈荅之篇。間居

宴集之賦。亦皆和平大雅。發於性情之正。而非幽人  
羈客。窮愁無聊。賴者所能為。予生與公同里。仕為後  
進。而追隨甚久。每詩成見示。輒吟咏盡日。心服其工。  
至觀議論風采。映蔽流輩。尤欽歎為不可及也。及今  
二十年後。復手前詩。所存者。瑰麗壯遠之辭。清高俊  
朗之調而已。回憶疇昔周旋。雖心目宛然。不勝玉樹  
土中之歎。若夫百世而下。覽斯集者。因詩言揚。抗之  
感想見

先帝之功德於無窮。必且頌聖人知人之明。為不可  
及也。嗚呼。盛哉。公雖弱冠登朝。而篤學不倦。故以息  
游名堂。其著述之富。不止於詩。詩其一體耳。介祉有  
雋才。喜為詩。能世其家學者也。

寶綸堂集序

華亭鶴沙許公彙輯其生平著述。自詩賦序記。以迄  
見聞雜錄。凡十二卷。郵致京師。問序於余。余受而讀  
之。竊歎其讀書之深。與學問之博也。乃其自序。則又  
以為因仕廢學。年五十始知讀書。又何歛然不自足  
耶。蓋天下惟真讀書之人。能自知讀書之晚。而所謂  
善讀書者。必原本性情。涵養器識。發而為言。始足以  
配德與功。而垂不朽。非僅尋章摘句。與雕蟲末技。爭

長於風雲月露間也。憶順治戊子冬。公始來京師。執經於先文貞公之門。公長余一歲。後余三年成進士。同官詞林。每天祿。校文。明光侍直。兩人年相若。驩相得也。暨出任方岳。陟外臺。明刑兩河。廣訪六詔。屢決大疑。剖大獄。皆經生學士。所欲一見諸施行。而不可得者。公恢上乎游。亦遇之。方冀報政還朝。秉鈞握軸。以佐聖天子休明之治。而公乞身歸養矣。蓋公天性最孝。

既已顯親揚名。念太夫人春秋高。不肯以三公易一日之樂。乃浩然言歸。歸未一年。滇黔告變。人皆服公先見為不可及。而不知誠孝所格也。余讀公集。於玉堂。應制諸作。彷彿歌明良。賡喜起。知公黼黻之才。於平反欽恤。簿書鞅掌。不廢嘯歌。知公經綸之暇。至解組歸田之後。友朋贈答。登臨寄托。則又知公之塵視軒冕。曠懷高蹈。如鴻飛鳳翥。可望而不可即也。蓋公自通籍以來。春花秋月。無一非讀書之時。山巔水涯。

無一非讀書之地。當其意有所觸。發言陳辭。如風行水上。自然成文。絳雲在霄。舒卷任意。未可為淺見。黜聞道也。余碌碌塵鞅。學殖荒落。視公家有園林丘壑之趣。坐有絲竹管絃之盛。時與嘉賓良友。為香山洛社之會。芒鞋竹杖。徜徉於九峯三泖間。又不待讀公之詩文。而余之有媿於公者多矣。聞公四十歲以前。夢寐中每見仙山樓閣。王者呼之為玉局中人。則是編當於丹臺紫府求之。少陵詩云。自是君身有仙骨。世似公。能無適然而笑乎。

人那得知其故。余雖知公之深。猶有未盡知者。舉以

徐華隱詩集序

學士徐華隱先生。少負雋才。以文章主東南壇坫三十餘年。聲名滿天下。其曾王父司馬公。與余王父方伯公。同舉會試。康熙壬子。華隱來京師。謁先文貞公於家。修世講之誼。出其所為詩文相質。先文貞擊節稱賞。退而語余曰。此館閣中人也。會詔舉鴻詞博學。用廷臣薦。

御試高等。入翰林。先文貞之言。若操左券。夫士當窮

居伏處。鬱々。又不得志。一旦直承明之廬。當著作之任。可謂不世之遇矣。而華隱歛然自下。敝車羸馬。無異諸生時。朝參之暇。閉門手一編。寒暑風雨。呼咭而夜不輟。其好學如此。未幾。進日講起居注官。皇上留心經籍。每有顧問。輒能道其本末。侍講帷最久。眷遇日隆。尋晉內閣學士。參預機密。余至是得與共朝夕。而益嘆先文貞之知人。有獨鑒也。華隱為人。光明洞鑒。絕無町畦。間與研究典故。洋洋纒々。終日

不倦。凡前代兵農禮樂。以及地方沿革。職官建置。瞭然如指諸掌。至於斟酌時務。揆度事理。咸中窾要。殆予瞻所謂酬酢庶務。雖少年有不如。貫串古今。雖專門所不逮者耶。今年春。請告歸里。於其將行。以所刻詩集若干卷。問序於余。余惟五言為三不朽之一。而詩又五言中之一。是何足以盡華隱之蓄積哉。然其原本經術。出入風雅。春容蘊藉。博大澄泓。非淺見欺聞者所能測其涯涘。余願讀茲集者。當知其閱覽績

學有裨實用。而不僅求之於詩。且以識余之同事日  
久。嚮慕親切。不至阿其所好也。

許中軒思補日錄序

思補日錄者。大中丞許公中軒。手輯前言往行以自  
儆。且遺其後人。永為著鑑者也。今嗣憲副孝超。祇承  
先志。復採數條續其後。將授諸梓。索予言序之。昔先  
文貞公與中丞公文最深。余亦奉教有素。屬在世好。  
不敢以不文辭。常憶中丞嘗

世祖章皇帝朝。受知深重。由侍御以及建牙。功名之  
盛。莫與頡頏。其按江右也。吏治為之肅清。其撫八閩



也。民風為之淳厚。至今章江區阜。螺海烏石間。猶有  
其棠之思。即舊時條采。尚能屈指其懿績。而深歎典  
型之如在。非公殫忠宣力。矢報國家。其建豎冒致此。  
其繫人思慕。又冒致此。今反覆斯編。而知公昔日殫  
忠宣力。矢報國家之念。固無時無地而不敬凜者也。  
夫思者。聖功之本。睿慮可以通微。故君子之持身也。  
非必有過而後補。即藏修游息。以至於涖政臨民。屋  
漏淵居。以至於大廷廣衆。其應事接物。莫不各有當

然之則在焉。苟於此有纖毫之未盡。或分秒之或踰。即  
是過所萌伏。思補云者。戰戰兢兢。求合於事物之所  
當然。不使分量少有欠缺而後止之謂也。然非考古  
得失之林。則又無所據以自信。有類於思而不學之  
為。公於是蒐輯古哲之聞猷德言。著於茲編。而以思  
補名之。殆深有契於聖人之旨。而皇皇如弗及者歟。  
今憲副克紹前列。膺畿輔刑名之寄。端焉。惟恐稍  
自隕越。致負君親。故續錄諸條。有關於讞獄聽斷者。

居多。誠可謂國之良牧。家之令子矣。昔先文貞公嘗  
研究於躬行心得之學。暗室獨處。儼若天日臨之。而  
特與中丞公契厚。端由於此。故不禁因憲副之請。而  
彌增慨慕云。

甯元著宜園詩序

丙子春。甯元著侍御來京師。晤余於青箱堂。寒暄定。

出所著宜園詩草示余。屬余為之序。余少於詩學。未  
能窺其堂奧。况年來衰老遲鈍。益就荒落。何足以知  
侍御之詩哉。雖然。余知侍御。非獨以詩也。憶三十年  
前。侍御自弱冠讀中秘書。即留心經濟大業。迨官兩  
臺。任事敢言。所條奏咸切中利弊。已視醜兩淮。尤赫  
、有聲。未幾坐言事罷官。家居平干。山川明秀。田疇

沃衍。蔬果滋殖。侍御築宜園讀書其中。歲時伏臘烹  
羊。魚羔。斗酒自勞。或與文人韻士。互相贈答。涼竹簾  
之暑風。曝茅簷之冬日。竟有所得。即寄之於詩。顧其  
詩多和平酣暢。而無愁苦太息之聲。此可以知侍御  
之善於處遇矣。嗟乎。以侍御之才之學。使其出為世  
用。馴致通顯。得益自發抒。嘉謨嘉猷。必有卓然可紀  
者。何僅、以詩取名當時。而傳後世耶。又念數十年  
來。升沈聚散。都非意計所料。即曩與侍御同館諸君。

存者不及什之二三。余自頽髮已種。而侍御言論  
丰采。猶不減時昔。益以覘其所養之厚。夫養之厚者。  
其發之也必弘。余固知侍御之造就。殆未可量也。

莊玉川詩序

康熙丙辰。同年廢子莊澹庵來京師。余一日過其寓。見案頭有詩一帙。清麗可喜。詢之。知為君弟玉川作也。澹庵因言玉川幼有耳疾。比長。益重聽。自傷屢試不得志。即得志。亦無益於時。聊寄情於此耳。余為惋惜久之。後十餘年。玉川以所為浣花集見示。則哀然成帙矣。且徵言於余。余展翫卒業。大抵取材元白。頡頏溫李。而幽情逸致。亦復自成一家。詩凡千餘首。詞

肯皆温厚和平。春容大雅。而無牢騷憤激之語。其蘊藉可知矣。玉川聰穎善悟。讀書過目不忘。旁及天官諸書養生家言。皆能舉其辭。抉其奧。其心思誠有過人者。昌黎謂張文昌盲於目。不盲於心。才人雖重聽。固無害其為聰也。獨是玉川以名家子。生長富貴。兩兄皆排金門。上玉堂。而玉川竟以疾廢。青衫憔悴。三十餘年。宜其中有不自得者。頽胸襟曠然。吟嘯自適。蓋足乎內。無待於外。自信於己。不求知乎人。殆有道

君子也。玉川又言有田在潯湖之西。去城市極遠。行將築浣花草堂於中。屏絕世務。賦詩種秫以終老。若深。有慕乎王無功。馬少游之為人者。然而其志亦足悲已。

徽言秘旨序

智者創物明者述之。莫不有當然之法。行乎其間。法者一定也。而其神明變化。則運於一心。况聲音之道。可以窮極窈眇乎。夫人生而靜。感於物而動。假器入神。其德莫優於琴。琴之制。始於上古。削桐繩絲。而曲數僅有其端。朱絃踈越。分刊節度。猶未備也。迨夫考其正變。辨其清濁。晰其輕重疾徐之殊致。術彌工。道彌遠。其可傳者法。而不可傳者。非法所能盡也。蓋古

人冥契於宮徵之先。故得意而忘數。後人推求於徽軫之末。每執器而遺神。遂使高山流水之間。撫絃動操。相悅以解。如孝尼之於中散。希逸之於顏回。邈焉罕覩。非其器。固弗習。非其人。莫與傳也。孫靜紫舍人。研精雙瑣之學。歷有年所。夙契於尹君芝仙。得其琴學指歸。訂正遺譜。探索序次。余詳閱其書。緩急引合之條。洵有同揆於古調者。古今人詎不相及哉。彼世之規。於器數者。曰雅音在是。即日取吟操句。剔而習

之。無以相應也。靜紫唯泊然寡營。涵養淵穆。宜其好學深思。知音相得。後先媲美。傳之無窮。當夫心閒手敏。觸挽如志。一彈再鼓之餘。必有移人性情者。雖曰微言。其畢焉遠望。洋洋翼翼之神。實在言表。而其旨又秘而難宣。然則春溫廉折之辨。非一心之所感召。歟。取斯編而細繹之。遇其心於櫛比之表。雖古人復起。亦必曠世相感矣。

胡夫人五十壽序

余自釋褐入史館。即獲交於少保。予袞胡公。相得驩甚。公官詞林為前輩。余以兄事之。謂其夫人為嫂。既以子女婚姻。綢繆肺腑。乃習聞其家政。而夫人相夫之敬。與翼子之慈。益彰。夫人者。京師大司農王孺劉先生之女。歸為公配。而余塔叅議介社之母也。夫人幼有女德。聰穎異人。居處禹茵璣翠之中。而好觀圖史。記傳。以自訓勵。王孺先生奇其士行。知有貴徵。其



歸少保公也。業當公魁南省。以進士高第。選讀秘書。蔚然負公輔之望。俄受宸眷。特知。超兩階。擢置講帷。進官學士。宣室通英之對。無虛日。春秋典試。所揚舉。當世俊乂甚衆。以成勞。特加官保。暨佐銓席。號稱水鏡。恩詔榮寵其先世。以及夫人。夫人筭珈象服。與公共祿食。齋予之奉。尊重無與比。然夫人恭勤有禮。不以世胄名封自汰。奉事舅姑。及祖姑。婦職修備。為仲季

擇娣。六禮皆極豐腆。耦俱進適。讓善下。念高堂重慶。願早得夢熊。以助含飴篤曾之樂。博求良家子。比御而入。恩均當夕。致慶問辰。嘗舉子者。教矣。此皆先事體公之心。而光顯其刑于之化。故公孝友譽聞。盛于家。斐于國。而樛木之仁。歸於夫人。公既請急。里居清高。善病。不屑家人生事。夫人綜理擘畫。悉中綱紀。鉅則賓祀宴享。必潔必虔。纖則織紉紡作。餼饘滌灑。孔多且旨。以至檢定經方。精治藥餌。莫不美善。至術

殫勢亟。祈以身代。恪恭婦順。可謂至矣。抑所更難者。  
方公乘箕歸甯。介祉甫脫襁褓。祿為藐孤。夫人蓋三十  
而娶也。則日夜恩勤撫育。冀其成立。及年稍長矣。乃  
盡發篋中遺經。課督肄習。寒暑無間。獨以身持門戶。  
吉凶細大之務。糾紛盤錯。應接中理。及介祉官工部。  
舍香縉雲之司。公餘燕侍。夫人色喜。為加七箸。已復  
謂曰。孺子幸而在事。宜立忠勤自効。非此何以步我  
武先子。而成外家之宅相耶。荆楚為西南都會。戊子

秋。必保公典試。號稱得人。迨介祉以監司分巡。到時  
將三紀。士民美其新。而思其先德。夫人教以廉惠  
律已。以敬業守官。曰。父樹桃李于門。子植甘棠於野。  
未亡人之願也。故介祉勉。簿書鞅掌間。政事修舉。  
晉擢齊藩。非夫人慈訓獎成。曷能致此哉。在昔詩紀  
所稱賢女。內則率多烹茗盛湘。佐餼澣衣之事。雍容  
婦職。以履休蒙。恭非能兼涉於憂患之途。而身履乎  
拂逆之境也。若夫人之鐘祥禹族。作配名臣。早歲遭

逢○盛○矣○。中○失○賢○雄○。興○咏○黃○鵠○。鞠○子○贊○述○。以○日○為○歲○。何○  
其○艱○也○。然○卒○能○九○熊○無○倦○。鳳○毛○翹○起○。收○效○又○何○易○也○。  
由○斯○以○觀○。夫○人○之○佐○內○。五○家○平○波○一○致○。贊○之○形○史○。實○  
為○卓○出○。蓋○其○凝○神○貞○一○。濬○智○淵○澄○。雖○處○震○撼○之○交○。而○  
泰○宇○有○默○定○者○。豈○非○福○祿○所○鍾○。難○老○無○疆○之○驗○歟○。歲○  
之○某○月○日○。為○夫○人○五○十○設○祝○之○辰○。余○以○葭○莩○至○戚○。撰○  
述○夫○人○之○賢○。以○申○閔○頌○。然○三○楚○人○士○。景○夫○人○之○母○儀○  
聖○善○。必○有○紫○裘○腰○笛○。濟○公○堂○而○奏○鶴○飛○之○曲○者○。亦○無○

俟○余○危○辭○為○也○。

寶積錄序

嘗聞古佛謂娑婆世界。以清淨音聞為教體。故西來傳心之旨。雖欲掃空諸相。不落言詮。而諸師心心相印。皆有契證。句<sup>之</sup>。一時學者。筆受而寶藏之。又刊諸方冊。以廣流通。而語錄由是興焉。猶涉川之必資於舟楫。求魚兔者之必假於筌蹄也。夫心之本體。即性也。一法不立。而萬用全彰。迥脫根塵。而真機獨露。其微妙至矣。然眾生為情見牽纏。鮮能安居止受。於是向

上諸師。設五疑情。假縱奪殺活之術。以去其黏縛。而使之透脫。粵及百世而下。有善思惟者。猶能即心而悟其機用。蓋如此之妙也。欽惟

世祖章皇帝。秉天宮福德之願。執金輪以統御天下。其深仁厚澤。所漸被。與如來法化。相為廣厚。而多生自悟之智。復有契於當日之涅槃妙心。間當萬幾暇時。游觀慧海。舉暢宗風。天光下垂。河沙徧照。凡得薰心注耳者。莫不霑慈蒙潤。無異春雷時雨。開滋萬卉。

之甲藥。而使之敷榮也。於時弘覺禪師志公。方以天童嫡子。主法東南。奉

詔而來。屢承顧問。不獨妙悟清機。足以仰符

睿旨。即其問難之際。辭辯風馳。撰述之餘。文采霞爍。蓋有石門北磬之遺芳焉。其得法上首弟子。歎堂和上。以見地超卓。代師秉拂入室。亦如圓悟之樂。有大慧。針鋒相拄。余時隨侍法筵。獲聞實義。雖未能現前發悟。而此心戚。識其妙。歸而掩關思入。則又彌覺

不可攀躋。間嘗披閱燈錄。思盡究古人之機用。而又  
以不見全書為歎。今禪師又歸寂滅。而余亦老矣。乃  
歎公自南還之後。奉禪師之遺囑。摺集唐宋古德及  
元明後出諸師語錄。凡前人刊布未備者。薈萃成編。名為  
宗門寶積錄。千里見示。且命為之序。余撫今追昔。味  
禪悅而增法喜。輒忘其固陋。願樂有言。以助正信。而  
又愧未能發明心地法門之萬一也。雖然。寶積經不  
云乎。如來所演八萬四千聲教。皆名為支離。學者於  
茲錄苟能作如是觀。向無義路處。覲體自見。則歷劫  
所失之衣珠。不來自得。一彈指頃。而家珍種。流出  
豈不快哉。是知歎公之孜孜編輯。誠為善繼先志。奈  
古尊宿潛德之光。而有功於斯道。固不小矣。

陳勿愚金剛經解序

余友遂城勿愚居士。著有金剛經大義解。書成。郵以  
示余。余受而讀之。既卒業。歎曰。是解不落塵詮。不染  
禪習。字、句、與五經四子之書相發明。蓋欲導學  
佛之人歸於儒也。吾儒之學。以窮理至命。為上達工  
夫。宗門之學。以明心見性。為真實妙諦。流雖分而源  
實一。自佛法入中國。相傳既久。習氣日深。万宗別派。  
創立名目。以虛空為實際。以機鋒為超解。以果報為

真境。開堂提唱。千百相和。於是文人學士。以其說之  
誕而無實。乃群起而闢之。而其徒究不能有所發明。  
以解群疑。而回衆惑。毋怪其教之凌夷。日與吾儒相  
背而馳也。居士憫焉。乃取金剛<sup>經</sup>大義。明白講解。皆有  
得於身心性命之原。而不入於虛空寂滅之語。知如  
來當日說法。所以開示衆生。勿生貪著。教人隨地體  
驗。真實修證。大抵可生可滅。可行可住。可過去。可現  
在。可未來。而一點靈明之根。確然有據。孔之仁。孟之

善。曾之明德。思之誠。皆是物耳。其言可謂深切著明  
矣。居士少為諸生。才名籍甚。尊甫大金吾忠園先生。  
以文章氣節自任。嘗云。三教<sup>流源</sup>。本皆合一。學者自  
分町畦耳。聞者以為有道之言。居士晚年。屏棄一切。  
惟以紹聞為事。於書無所不窺。而尤邃精儒釋之理。  
吾知讀是解者。不獨宗門老宿。得灑然。即才人學士。  
亦莫不頓首稱善。而深悟於源流合一之理。蓋學<sup>家</sup>之相  
傳。有自來矣。




仁庵和尚語錄序

性本圓明。如大月輪。光輝普照。余觀閻浮提中。大而河海。小而沼沚。有一川之水。即有一川之月。有百川之水。即有百川之月。仰而觀之。中天之月。未嘗分也。蓋月譬則性。水譬則境。一化為千萬。千萬復歸於一。無所感。無所不感。無所應。無所不應。若夫善根具足。性體圓通。全象皆明。無所虧欠。正如月在澄潭。不留纖毫塵滓。或為結習所使。業識所導。如月在濁水潭。

然無見而又加以利欲之熏灼。物累之營擾。則狂飈  
回起。翻濤鼓浪。詭怪出沒。變幻恍惚。求一隙之明。不  
可得矣。儒曰明德。釋曰見性。厥義維均。無二致也。象  
教西來。徧於中土。衣鉢相傳。薪火相續。開堂陞座。提  
唱紛然。求其於心性工夫。尋覓實地。則趺坐而談。合  
掌而聽者。似俱茫乎未有得也。豈不痛哉。仁庵敷禪  
師。傳臨濟宗。悟無上乘。一瓶一鉢。往來燕吳間。初住  
津門之淨業庵。繼而卓錫於姑孰之廣福寺。所至弘

宣法乳。大闡宗風。欲使人澄汰濁波。仍還皓魄。機鋒  
敏捷。觸處無碍。皆由其性地明徹。橫拈倒豎。無所不  
可。非僅襲前人窠臼而已。雖然。筌所以取魚。得魚而  
忘筌。蹄所以逐兔。得兔而忘蹄。言所以象意。得意而  
忘言。是錄也。無亦魚兔之筌蹄乎。諸心非心。諸相非  
相。心相俱空。法在何處。請禪師更於此下一轉語。



Faint, illegible text is visible on the right page, likely bleed-through from the reverse side of the leaf. The text is arranged in vertical columns and appears to be in a traditional East Asian script, possibly Chinese or Japanese. The characters are too light and faded to be accurately transcribed.

